

non servat juramenta pape. Ideo ab Innocencio 4^o in concilio generali deponitur et tamen tenet(?) principes longo tempore contra papam et occulte moritur in Ytalia, set aliqui dicunt eum adhuc vivere et male.

1247. Hinricus Raspe, lantgravius Thuringie et Hassie, eligitur post deposicionem Frederici. in bello vicit Conradum filium Frederici prope Francfordiam in die sancti Dominici confessoris. Ideo monasterium ejus constituit in Ysenaco et moritur eodem anno quo eligitur in fluxu ventris, et sepultus est (in) monasterio monialium in monasterio ad S. Katherinam apud Ysenach. Hoc tempore floruit Bonaventura, Thomas de Aquino.

Wilhelmus comes Holandrie a Frisonibus occiditur 1248 (rect. 1256).

1258. Richardus, frater regis Anglie, eligitur et pecunia ab eo petitur, quam noluit dare; ideo recessit et redit in terram suam.

1272. Rudolphus de Hobesburg comes eligitur et multa bona facit, et bene rexit.

Adolphus comes de Nassaw. Hic accepit milia (sic) marcarum a rege Anglie, ut auxilium prestaret ei contra regem Francie, et tamen non fecit. Ideo confusus est imperator.

1300. Albertus filius Adolphi (sic). Hic centesimus imperator fuit. Unum oculum habuit, quia venenum ei datum fuit, quod medici non potuerunt nisi per oculum expellere.

1317. Hinricus VII. comes Lotaringie. Post eum Lodewicus dux Bavarie et cum (eo) eligitur dux Fredericus Austrie, et mutuo pugnant et vincitur tandem Fredericus et renucciat (sic) imperio. Dyabulus voluit eum liberare a captivitate, set non permittitur, quia signo crucis fugatur; adjuratus tamen fuit dyabulus ut non liberaret. Tandem Lodewicus excommunicatur, et componitur liber qui dicitur Defensor, probare volens imperatorem a Deo, non a papa, set reprobatus est liber. — Nicolaus de Lyra viguit.

1347. Karolus 4^{us} Bohemus eligitur. Hic habuit patrem Johannem cecum, cum quo transivit ad regem Francie, ut pugnaret contra regem Anglie, et cecidit in bello rex Bohemie, pater Karoli, et alii nobiles multi, et victor fuit rex Anglie. Hic Karolus bene rexit, populum suum exaltavit, studium universale ad Pragam adduxit, Wentzelaum filium suum secum seniore (sic) regem cum consensu electorum disposuit et tribus annis ad judicandum sedere fecit, et tunc obiit anno 1378, et fecerunt planctum magnum super eum.

1384. Wentzelaus filius Karoli. — Crucifixores hoc tempore sicut tempore patris ejus currunt et molestant ecclesiam, fidem malam inducere volunt et heresim. Set papa eis resistit et prohibet, sicut prohibuit tempore Karoli 4^{ti}. — Hic Brigitta canonisatur.